

L'USAGE  
DES  
TOVRBIERES,  
POVR LE  
REESTABLISSEMENT  
DES PASTVRAGES,  
Riuieres & Forests  
de France,


*Et choses qui en dépendent.*




A PARIS,  
Chez SAMVEL THIBOUST, au Pa-  
lais, en la Gallerie des Prisonniers.

---

M. DC. XXIV.





L' V S A G E

DES TOVRBIERES,  
Pour le restablissement des  
Pasturages, Riuieres, & Fo-  
rests de France, & choses qui  
en dependent.

**E**SCRIRE d'un subject que  
iamais homme n'a escrit, re-  
stablir les Pasturages, Riuie-  
res & forests de la France,  
c'est ce qui sera estimé vne entreprinse  
trop hardie & de difficile digestion, à  
ceux qui estiment plusieurs choses ve-  
ritables mensongeres, parce qu'elles  
sont nouuelles & exaucées par dessus la  
capacité de leur entendement.

C'est pourquoy en l'examen d'une af-  
faire si importante, il ne faut pas des vi-  
sages d'hommes, des pourtraicts esten-  
dus ou racourcis, il faut des hommes  
qui soient capables de cognoistre, d'en-  
tendre & iuger, de comprendre, & fai-

re, & nō de tels qui comme ombres seulement se portent d'une region en autre, refroidis & glacez en leurs affections, assoupis en leur insuffisance, transportez par leurs vanitez, passionnez à leurs interests, & qui ne croient rien se devoir & pouvoir accomplir, audeffus de leur imbecille capacité.

Le Senat de Venise a pour object de proceder aysément & seurement en toutes ses affaires : C'est ce qui se peut faire en celle dont est question, en laquelle on ayme mieux le iugement de peu d'hommes sages & du commun peuple, que de plusieurs ignorans & moqueurs. On sçait que l'on ne peut establir chose tant bonne, ou tant bien ordonnée & necessaire que l'on n'y trouue à redire, & qui ne soit choquée par l'aduis & opinion des ignorans, desseins des particuliers, accompagnez de calomnies ouuertes, lesquelles nous consumerōs par le feu, comme le plus fertile des elemens, le plus goulū & necessaire de tous, lequel paroissant par toutes les villes, bourgs & bourgades du Royaume de France, nourry & entrete-

nu de terres combustibles, que nous appellerons Tourbieres, feront voir clairement & nettement, que par ce moyen on peut chauffer toutes sortes de fourneaux, & cuire toutes sortes de viandes. Et partât que les coupes des forests n'estans plus si necessaires pourront recroistre en belle essence suiuant le dessein des feu Roys d'heureuse memoire par la reserve du tiers d'iceux par toute la Frâce.

Et que lesdites Tourbieres estans prises & fouillées dâs les abismes Croulières & Mollières en droite ligne, & façon de canal, rendront les Pasturages de de France à sec, durant les grandes inondations, & arrousez durant les grandes secheresses.

De la descharge desquelles Tourbieres, & abismes d'eauës, les ruisseaux & riuieres seront secouruës & remplies, les eaux des Tourbieres ne diminuant pour les secheresses, estâs sources viues, comme l'on voit és riuieres d'Estampes & de Vannes, & autres, lesquelles durant les plus grandes secheresses abondent autant ou plus en eau, que durant les grandes inondations.

Et par ainsi desgourdissant les esprits assoupis , on fera voir à la France les moyens de nous rendre commode les Croullieres , Mollieres , & abysses d'eaux , prouenans des Tourbieres, lesquelles nous ont esté iusqu'à present en plusieurs sortes incommodes , puis que terres pourries trop abreuées, ne produisant qu'herbes enrouillées & de maligne nature , causant diuerses maladies au bestail qui en mange, iusqu'à luy faire pisser le sang, sans les autres incommoditez, enfondrans dans la mollesse d'icelles , d'où vient souuent que le bestail est plustost mort qu'on aye aduis de la cheute, tant à cause de la difficulté de l'abord , que de ce que le bestail remuant s'enfonce insensiblement.

Les laboureurs tienēt pour terres inutiles celles dont l'eau sort puante, sale, ou de mauuaise odeur & saueur, comme celle qui sort de la Tourbiere, tiennent pour maxime irrefragable que la bonne terre sentle à l'air, comme la paste par le leuain, & la mauuaise terre diminuē à l'air, comme fait la Tourbe, laquelle diminuē de moitié, dont s'ensuit que puis

que ceste terre est non seulement infructueuse, mais mesme tres-dangereuse, soit en son fonds, soit en sa superficie doit estre ostée & appliquée aux vsages qu'elle peut seruir, afin que d'inutile elle deuienne vtile, & de dangereuse necessaire, & que le bois flotté venât à defaillir, comme nous en sommes à la veille, nous puissions remedier à la disette inéuitable du bois de chauffage, lequel à iuste occasion est estimé la moitié de la vie mesme, suggerant aux plus grandes necessitez qui nous puissent arriuer.

Et considerant que la bonne police plus que les solides masses de pierre ont donné subject aux principaux hommes du monde de nommer Rome la ville eternelle, & que la plus grande police que l'on puisse pratiquer en l'estat, est de ne souffrir qu'il en demeure aucune partie oisue & mal-faisante, comme sont lesdites Tourbieres.

Par l'vtile employ d'icelles i'espere me rendre agreable à mon Prince, vtile à ma patrie, honorable à mes amis, plustost par la voye actiue que contemplatiue, n'estant entré dans le cu-

rieux de ceste recherche de Tourbieres, que pour ceste seule occasion estimans que la science n'estoit point comme vn tailleur d'images qui face des statuës mornes & sans mouuement, ains vne maistresse qui rend le cœur des hommes qui l'ayment vifs, remuās actifs apres les plus belles choses profitables au public.

Mais i'enten quelqu'un qui dit qu'on ne doit point receuoir de nouveautez pour beaucoup d'inconueniens qu'on ne peut preuoir.

A. celuy-là ie respondray volontiers qu'il n'est pas beaucoup instruit en l'histoire estrāgere & septentrionale, & que quand il n'y aura plus en France de Mollieres, Croullieres, marefts sauua- ges, & tremblans, tartres bourbon- noises & abyssmes, & qu'au lieu d'icelle il y aura des canaux pour deschar- ger les eaux d'icelles durant les grandes secheresses, dans les ruisseaux & riuie- res prochaines, quel danger y aura-il ? mais au contraire quel bien ameliorant les pasturages, qu'un arpent en vaudra plus que cent auparauant: Les eaux s'es- coulant necessairement dans lesdits ca-



naux, les moulins moudront sans escluses, nos ruisseaux deuiendront riuieres, nos riuieres non nauigables nauigables, & les nauigables seulement huiët mois de l'année le deuiendront continuellement.

Concluons donc & disons puis que l'anagramme de Remise est misere, que miserable sera celuy qui l'empeschera, cognoissant que par l'vsage d'icelles on peut esperer le restablissement des pasturages, des riuieres & forests de France : Qui en voudra sçauoir d'auantage, aille voir l'espreuue qui en a esté faite, au lieu appellé la mer morte es Croullieres Mollieres de Lay & Cheuilly, pres Cachan, nonobstant le degast qui en a esté fait le iour de la Pentecoste dernière par le Preuost desdicts lieux, qui est cause de la discontinuation, iusques à ce qu'il ayt pleu à la Cour de Parlement infirmer ou confirmer le iugement rendu contre ledit Preuost.

---

Ensuit l'aduis donné au Roy  
par Messieurs de la Table

de marbre du Palais à Paris, pour l'usage desdites Tourbieres.

*Extraict des registres des eaux  
& forests de France, au siege  
general de la Table de mar-  
bre du Palais à Paris.*

**A** Vjourd'huy 29. Decembre 1621.  
en la Chambre des eaux & forests  
de France, au siege general de la Table  
de marbre du Palais à Paris, est compa-  
ru iudiciairement pardeuant nous Lieu-  
tenant General, Particulier, & Conseil-  
lers audit siege, M. Charles de Lamber-  
uille, Aduocat au Conseil Priué du Roy  
& en la Cour du Parlement, lequel en la  
presence des Aduocat & Procureur ge-  
neral du Roy en cestedit Cour, Nous a  
remonstré qu'en l'année 1616. il auroit  
esté député par le Roy & Nosseigneurs  
de Parlement de Paris en la Chambre  
de l'Edict, pour informer de la commo-  
dité ou incommodité de la negotiation

proposée par certains marchands pour le transport du bois de chauffage des pays du Nort en France, esquels lieux ledit de Lamberuille s'estant transporté procedant à ladite information, auroit particulièrement aussi informé de l'usage & commodité de certaines terres combustibles, dont les habitans desdits pays chauffent leurs fourneaux, & cuisent leurs viandes, desquelles estant de retour en France, ayant fait recherche suivant ladite informatiō, il auroit trouvé quantité desdites terres proches de plusieurs rivières nauigables descendantes dans les rivières de Somme, Seine, Loire & Garonne, suffisantes pour fournir la France, pourveu que dès le commencement elles soient bien menagées, par l'usage desquelles on pourra remedier à la degradation generale des forests de ce Royaume: A ces fins il auroit présenté vn placet au Roy, à ce qu'en consideration de l'usage desdites terres appellées Tourbieres par luy introduict en France, il pleust à sa Majesté luy accorder l'office d'Intendant, & Contrôleur general des Tourbieres de Fran-

ce, lequel placet ayant esté par la Majesté renuoyé en son Conseil pour donner aduis pour suiuant le contenu en iceluy, luy estre pourueu ainsi qu'il appartiendroit, & à nous par ledit Cōseil, pour acclereler lequel aduis, & faire voir au public l'vtilité desdites Tourbes, Nous au-roit iceluy de Lamberuille requis acte de ce qu'il auroit presentement en nostre presence, & desdits Aduocat & Procureur general du Roy fait l'esprouue desdites Tourbes dans la cheminée de ladite chambre, pour luy seruir ce que de raison. Surquoy du consentement dudit Procureur general du Roy en ceste dite Cour, Nous auons donné acte audit de Lamberuille de ladite esprouue par luy presentement faite en nos presences desdites Tourbes, & de ce que nous auons veu & reconnu icelles, bruster & rendre feu & flame propre à chauffer, par le moyen dequoy estimōs que l'vsage d'icelles apporteroit vne grande descharge & espar-gne des bois & forests, tant du Roy que des Ecclesiastiques seigneurs & particuliers, & un grand soulagement aux pauures gens. Fait les iour & an que dessus. Ainsi signé

DV HOVLX.

15  
Ensuit l'alignement donné à la  
requeste des Syndics et ha-  
bitans de Lay & Chevilly au  
sieur Hubert & ses associez  
à l'œconomie des Tourbieres  
de Frâce, pour travailler sui-  
vant l'ordre à luy donné par  
ledit sieur de Lamberuille és  
Tourbieres de la Mer morte,  
Molieres & Croulieres de  
Lay & Chevilly.

L'An 1624. le 26. iour du mois de  
Mars, j'ay soubs-signé Alexis Erard  
Ingenieur ordinaire du Roy, me suis  
transporté és Mollieres de Lay & Che-  
uilly, à la requeste du sieur Hubert &  
ses associez à l'œconomie des Tourbie-  
res de France & des Syndics des habi-  
tans de Lay & Chevilly, suivant l'acte  
par eux passé le jourd'huy pardevant  
Barbier, Greffier dudit lieu, pour don-

ner vn alignement le moins domma-  
geable que faire se pourra pour lesdicts  
habitans, & plus profitable pour le re-  
stablissement de la riuere des Gobelins,  
lesquelles Mollieres ayant meurement  
consideré & recognu que ladite riuere  
deffordoit en tout temps dans lesdites  
Mollieres, qui les rendroit dangereuses  
& du tout inutiles, mesmes diminuoit  
grandement le cours de ladite riuere.  
Veu aussi le consentement & déclara-  
tion desdits habitans faite audit Hubert  
& option referée d'y faire vn canal de  
telle largeur, longueur & profondeur  
que bon leur semblera, au plus hault de  
leurs Pasquis, i'ay ausdites parties repre-  
senté qu' auparauant de faire faire ledict  
canal au hault desdits Pasquis, il estoit  
prealable d'en faire vn autre plus bas au  
deffouz desdites Mollieres pour rece-  
voir les eaux d'icelles avec vne chaussée  
sur les bords & extremittez desdites Mo-  
lieres, aboutissant à ladite riuere pour  
en empescher le debord en icelles, & ti-  
rer d'vn droict alignement vn canal  
le long de ladite chaussée à trois pieds  
pres des sinuositez de la riuere sur qua-

tre toises de large, & le plus de profondeur que faire se pourra, avec des saignées d'une toise de large de cent toises en cent toises depuis le hault de leurs Pasquis ou ancien cours iusques dans ledit canal, pour plus commodément conduire les eaux desdits abysses Molieres, Croulieres, sources & sangsuës en iceluy, & luy bailler descharge au bas desdits Pasquis dans la riuere, ce qui rendra lesdites Molieres de pareille nature que leurs Pasquis augmentera les eaux de la riuere en tout temps, particulièrement durant les grandes secheresses que ladite riuere est en danger d'estre à sec, à cause du destour qui doit estre fait en brief du ruisseau, prouenant & qui fait moudre les moulins de Lay & Rungis, laquelle chaussée faudra faire de gazōs de terres glaises & franches qu'on trouuera, faisant ledit canal, & nō de terre spongieuse & de tourbiere, lesquelles il faudra faire transporter, afin que les grandes pluyes & inondations de ladite riuere suruenant ne remplissent de nouveau ledit canal, comme celui que les habitans dudit Lay & Che-

uilly auoit fait au temps passé le long & sur le hault & panchant de leurs pasquis ou comme le cours & liêt de ladite riuiere le long desdites Molieres, dans lequel y a present d'un bout à l'autre trois & quatre pieds de bourbe & d'auantage, qui cause le debord de ladite riuiere & degast desdits pasquis : C'est l'aduis à allignement que j'ay donné ausdictes parties en leur presence, & de leur consentement le iour & an que dessus.

Signé

ERARD.

Auquel canal ledit Hubert auroit fait traualier depuis la mi-Caresme iusques audit iour de la Pentecoste, suiuant ledit allignement, comme est iustifié par le procès verbal de descente sur lesdicts lieux du 31. May dernier, fait par Monsieur le Lieutenant en la Maistrise particuliere de la Preuosté & Vicomté de Paris, en la presence du Procureur du Roy en icelle, & du sieur Erard Ingenieur, qui auoit donné ledit allignement & des experts nommez & conuenus d'office, qui ont estimé ledit degast de 535. toises, le fort portant le foible, à raison de 8. liures la toise seulement.